



Broj: 02-04-170/20

Datum, 31.01.2020. godine

ZAPISNIK

sa 33. redovne sjednice 6. saziva Općinskog vijeća Doboj Istok

Tridesettreća redovna sjednica 6. saziva Općinskog vijeća održana je dana 25.01.2020. godine u zgradi općine Doboj Istok, u Klokočnici, sa početkom u 10,00 sati.

PRISUTNI: 15 vijećnika, Kemal Bratić, općinski načelnik, Omer Hadžić, sekretar općine, Admir Šišić, ovlašteno lice da zamjenjuje pomoćnika općinskog načelnika za društvene djelatnosti, branilačko – invalidsku zaštitu i opću upravu, Alirizah Mujkić, pomoćnik općinskog načelnika za poduzetništvo i finansije, Sulejman Delić, pomoćnik općinskog načelnika za civilnu zaštitu i Abdulah Hrnjičić, ovlašteno lice za zamjenjuje pomoćnika općinskog načelnika za prostorno uređenje, te predstavnik RTV TK.

ODSUTNI: Izet Hodžić, predsjednik kluba vijećnika GDS i nezavisni vijećnik Sajib Mešić i Senada Džanić, predsjednica kluba vijećnika SBB i BPS.

Sjednicu je otvorio i vodio predsjedavajući Općinskog vijeća, dr. Ferid Konjić.

Dr. Ferid Konjić, predsjedavajući Općinskog vijeća: „ Selamim načelnika sa saradnicima, predstavnike medija, kolegice i kolege vijećnike. Otvaram 33. redovnu sjednicu ovog saziva Općinskog vijeća. Izostanak sa ove sjednice najavio je Izet Hodžić. Molim tehničkog sekretara da nam provjeri prisutnost ostalih vijećnika. Prisutno je 15 vijećnika, a odsutna je i Senada Džanić.“

VIJEĆNIČKA PITANJA I INICIJATIVE

Dr. Ferid Konjić, predsjedavajući Općinskog vijeća: „ Ukoliko ima pripremljenih vijećničkih pitanja i inicijativa dajem mogućnost da se iznesu.“

Kemal Skopljak, vijećnik BPS: „ Prije svega želim da pozdravim i poselamim sve prisutne. Ja imam jedno vijećničko pitanje obzirom da smo na Kolegiju Općinskog vijeća imali jedan dogovor tj. zaključak da Općinski načelnik posjeti Dom zdravlja i prostorije Hitne medicinske pomoći i sam se uvjeri da su dvije prostorije od službe Hitne medicinske pomoći oduzete i da su date na upotrebu fizijatriji. Time je drastično narušen komfor i kvalitet usluga u službi Hitne medicinske pomoći, kao i komfor pacijenata koji koriste usluge službe Hitne medicinske pomoći. Pitanje glasi: Da li je Načelnik obišao te prostorije i da li je obavio razgovor sa nadležnim u Domu zdravlja, te da li je urgirao da se prostorije vrte službi Hitne medicinske pomoći?“

Kemal Bratić, općinski načelnik: „ Predsjedavajući, zamjeniče, uvažene vijećnice i vijećnici, pomoćnici, predstavnici medija esalamu alejkum i dobro jutro. Ja sam posjetio Dom zdravlja, ne znam da li 2 – 3 dana poslije Kolegija, da se uvjerim. Ne mogu ulaziti u to da li zadovoljava potrebe osoblja koje radi u Hitnoj pomoći, ali sam tražio od direktora da održimo sastanak sa

šefom službe doktorom Zijadom, ako se ne varam. U narednom periodu ćemo održati sastanak, jer obično se sasluša i druga strana. Vi ste iznijeli to pitanje i ja ću to uraditi do naredne sjednice da vidimo da li će se to vratiti ili neće vratiti. Uglavnom održat ćemo jedan radni sastanak sa direktorom Doma zdravlja, šefom službe i medicinskom sestrom koja je takođe zadužena za Hitnu službu i koja radi u Hitnoj službi.“

Dr. Ferid Konjić, predsjedavajući Općinskog vijeća: „ Nema više prijavljenih vezano za vijećnička pitanja i inicijative.“

USVAJANJE ZAPISNIKA SA PRETHODNE SJEDNICE

Dr. Ferid Konjić, predsjedavajući Općinskog vijeća: „ Dobili ste zapisnik sa 32. redovne sjednice i ukoliko ima primjedbi na zapisnik dajem mogućnost da se iznesu. Ne vidim prijavljenih. Ko je za zapisnik?“

Glasanje: ZA – 15.

USVAJANJE DNEVNOG REDA

Dr. Ferid Konjić, predsjedavajući Općinskog vijeća: „ Dobili ste dnevni red koji je usaglasio Kolegij, a dobili smo i proširenje dnevnog reda. Proširenje dnevnog reda se odnosi na:

Razmatranje i usvajanje prijedloga Odluke o finansiranju projekta izgradnje pristupnog puta i parkirališta za potrebe JZU Dom zdravlja Doboj Istok i Mjesne zajednice Klokočnica.

Mi smo na prošloj sjednici Općinskog vijeća donijeli odluku o eksproprijaciji zemljišta. Ima li potrebu neko nešto da kaže? Ako nema, ko je za da ide tačka na dnevni red?“

Glasanje: ZA – 15, PROTIV – 0, UZDRŽANIH – 0.

Na ovaj način proširujemo dnevni red za još jednu tačku tako da će ovo biti prva tačka dnevnog reda. Ko je za kompletan dnevni red?

Glasanje: ZA – 15, PROTIV – 0, UZDRŽANIH – 0.

Usvojen je sljedeći:

D N E V N I R E D

1. *Razmatranje i usvajanje prijedloga Odluke o finansiranju projekta izgradnje pristupnog puta i parkirališta za potrebe JZU Dom zdravlja Doboj Istok i Mjesne zajednice Klokočnica,*
2. *Razmatranje i usvajanje prijedloga Odluke o dodjeli općinskih priznanja,*
3. *Razmatranje i usvajanje prijedloga Programa aktivnosti za obilježavanje Dana nezavisnosti BiH i Dana općine Doboj Istok,*
4. *Razmatranje i usvajanje Izvještaja o realizaciji Programa rada Općinskog vijeća Doboj Istok za 2019. godinu,*
5. *Razmatranje i usvajanje Izvještaja o kvaliteti zraka na području općine Doboj Istok.*

REALIZACIJA DNEVNOG REDA

Ad. 1. Razmatranje i usvajanje prijedloga Odluke o finansiranju projekta izgradnje pristupnog puta i parkirališta za potrebe JZU Dom zdravlja Doboj Istok i Mjesne zajednice Klokočnica.

Dr. Ferid Konjić, predsjedavajući Općinskog vijeća: „ Tačku dajem na diskusiju.“

Mehmed Mehinović, predsjednik kluba vijećnika SBiH: „ Selam alejk i dobar dan svim prisutnim i nadam se da ćemo biti efikasni i brzi pošto sam prehladen i ne bih smio pričati, ali samo jedno objašnjenje. Želim da me niko ne shvati pogrešno, naravno podržat ću ovu Odluku i tu nema nikakve dileme. Želim da mi neko pojasni, da ne bi Općinsko vijeće došlo u koliziju, jer je u zaključku rečeno da ukupna vrijednost nepokretnosti po m² iznosi 45 KM. Nikakav nije problem samo da mi neko pojasni, jer mi svake godine utvrđujemo vrijednost kvadratnog metra. Da li se to slaže sa tom Odlukom, ako se ne slaže da nekako izmijenimo, ako se slaže sve je u redu. Samo da vidimo da li je u skladu sa Odlukom koju mi donosimo ili je ovo nešto posebno. Svakako ću podržati ovu Odluku samo da znamo šta je, ima li smetnji ili nema.“

Kemal Bratić, općinski načelnik: „ Ovo nema veze sa onom Odlukom koju mi donosimo. Ovo je komisija koja vrši procjenu za svaku parcelu, za svaki objekat koji se kupuje ili prodaje i koju je Općinsko vijeće imenovalo. Ona je procijenila vrijednost zemljišta, a svi mi znamo da je otprilike to ta vrijednost u središtu Klokočnice ili neke druge mjesne zajednice na području općine Doboj Istok.“

Dr. Ferid Konjić, predsjedavajući Općinskog vijeća: „ Ima li još diskutacija? Ne vidim prijavljenih i dajem na izjašnjavanje. Ko je za ovu Odluku?“

Glasanje: ZA – 15, PROTIV – 0, UZDRŽANIH – 0.

Ad.2. Razmatranje i usvajanje prijedloga Odluke o dodjeli općinskih priznanja.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Fajik Muratović, vijećnik SDP: „ Pozdrav svim prisutnim. Iskoristio bih ovu govornicu da objasnim zašto nisam bio tri puta na Vijeću. Za svečanu sjednicu nisam pročitao poruku pa nisam došao, na drugu sam zakasnio, mislio sam da je u 10 i došao sam na kafu, a treću sam bio spriječen. Osjećam potrebu da se izvinem što nisam bio prisutan. Što se tiče ovih priznanja čestitam svima koji su predložili ove ljude i Komisiji koja je izabrala predložene kandidate za dodjelu priznanja. Ja poznajem sve ove ljude i nisam ni jedno ime našao da se zapitam zašto je on tu. Ja bih se ovaj puta osvrnuo na gospodina Sulejmana Hasančevića, jer je on jedini koji nije iz borbenog sektora, ali moram objasniti zašto sam izašao da se obratim po pitanju ovog gospodina. Poznajem ga vrlo dobro i znam šta je sve odradio do sada. Sulejman, kako smo ga mi zvali Suljo Gužvara, neće mi zamjeriti, jer smo prijatelji, je počeo sa svojim radom i aktivnostima prije nego što je formirana i Armija BiH i civilna zaštita i Općina. On je dao nemjerljiv doprinos u zbrinjavanju nas izbjeglica, jer je dio moje porodice bio gore smješten. Kada on na sebe preuzme porodicu ili čovjeka on mu nađe smještaj, brine se za lijekove, pelene, mlijeko djeci, ogrev i sve ostalo. To je bio jako zahtjevan posao, ne spominjem da bi sebe promovisao, ali bio sam komandant kriznog štaba u svom rodnom mjestu i znam kako je bilo teško smjestiti 100 ili 200 izbjeglica, a ne hiljade koliko je prošlo kroz taj kraj. On se nije nikada hvalio, pa ću zato ja

ispričati šta je on sve to radio. Četiri godine njegova porodica je bila non stop uznemiravana. Ovim putem se zahvaljujem njegovoj gospođi i njegovoj djeci koji su imali razumijevanja i snage da to sve prihvate i podnesu. U njegovoj kući je bilo smješteno izbjeglica i 24 sata je kuća bila na raspolaganju. Ako uzmemo i vidimo kako je teško nekog čovjeka nekom utrpati u kuću, a on je za četiri godine za hiljade ljudi našao smještaj i nikada se nije zamjerio sa ljudima. Ovom prilikom hoću da se zahvalim zapadnoj Klokočnici koja je podnijela najveći teret što se tiče nas prognanika i mogu slobodno reći i vojnika iz svih krajeva koji su dolazili ovdje. Pričao sam malo o tom civilnom dijelu, znači nije bilo zgodno otići i čovjeku isjeći šumu da se nabavi ogrev i pokrivača za zemunice i sve ostalo. Sve i jedan borac koji je došao, a tamo je bilo smješteno više komandi i jedinica, je bio adekvatno zbrinut i obezbijeđen. Ono što nije mogla uraditi civilna zaštita za dva dana, to je Suljo za dva sata radio. To mogu potvrditi ljudi koji su tu bili prisutni i ja sam bio gore smješten sa 7. četom tako da znam o čemu se radi. Zahvaljujem se Sulji koji je ostao takav kakav jest, da nikada za njim nije krenula negativna priča po pitanju raspodjele sredstava, humanitarne pomoći ili bilo čega drugog. Nastavio je svoj rad sve do dan danas i čovjek kada mjeri, a svi znate moj doprinos i njegov, jer lahko je bilo uzeti pušku, tamo je neprijatelj i evo ga, ali sa svojim ljudima je jako teško bilo, a on je sve to podnio i iznio na jedan perfektan način. Ovom prilikom zahvaljujem u ime izbjeglica i boraca njemu, ovom kraju i njegovoj porodici.“

Dr. Ferid Konjić, predsjedavajući Općinskog vijeća: „ Hvala Fajki na ovom emotivnom iznošenju. Mislim da se svi slažemo sa njegovim izlaganjem i da je to potvrda čiji se rad na kraju vrednuje.“

Emira Karić, predsjednica kluba vijećnika SDP: „ Dobar dan želim svima. Ja ću kao kolega Izet, nisam se htjela javiti pod ovom tačkom dnevnog reda, jer sam bila na Komisiji i očekivala sam da će javiti se predsjednik, ali možda se kasnije javi. Međutim, nakon Fajke zaista su se probudile emocije i želja da nešto i ja kažem vezano za ovu tačku. Hvala ti Fajko i želim da kažem da je ovo poenta ovih nagrada. Mi na Komisiji nismo imali problema, jer šta je bilo to je i uvršteno, a čak nemamo po dvije osnove zato što se izgubio smisao. Fajko nam je na ovaj način malo vratio smisao, ali nije smisao ovdje ga vratiti, smisao je vratiti na tim nekim dešavanjima. Upravo ovakve dogodovštine, pa možda i neke prezentacije, možda naći neke slike i malo ozbiljnije doživjeti ove nagrade. Mi ćemo uvijek imati doprinos u odbrani zemlje, uvijek će se neko nekoga sjetiti, ali će se izgubiti smisao ukoliko se to ne izvede bar stepenicu više. Društveni razvoj i ostalo ćemo sve manje imati, jer to ljude više ne zanima, zato što dođu prime, ostanu 5 minuta i ne vide u tome značaj. Ovo što je Fajko iznosio upravo na ovaj način vratit će smisao tih dodjela priznanja, a ja bih iskreno voljela da se vrati, jer mislim da ni stranke ni mjesne zajednice neće imati više želju za predlaganjem.“

Selmin Karić, vijećnik SDA: „ Uvaženi predsjedavajući, zamjeniče, načelnice sa saradnicima, kolege i kolegice vijećnici, predstavnici medija esalamu alejkum i dobar dan. Komisija za odlikovanja i općinska priznanja je prije svega na sastanku održanom 20.11.2019. godine donijela odluku o raspisivanju javnog poziva za dostavljanje mišljenja i inicijativa za dodjelu društvenih priznanja općine Doboj Istok. Javni poziv je objavljen na web stranici općine, upućen je boračkim udruženjima mjesnim zajednicama, političkim partijama, kulturno – umjetničkim društvima i Sportskom savezu općine Doboj Istok. Komisija je dana 10.01.2020. godine održala sastanak na kome je konstatovala da su sve prijave dostavljene u roku predviđenim javnim oglasom. Obzirom da je bilo pet prijedloga Komisija nije puno raspravljala o njima, svi prijedlozi su prihvaćeni jednoglasno osim Zlatne značke općine za doprinos u društvenom razvoju, jer je jedan član Komisije bio uzdržan. Prijedlozi za dodjelu općinskih priznanja:

Za Plaketu općine Doboj Istok : Hasančević Sulejman iz Klokočnice - za doprinos u društvenom razvoju mjesne zajednice,

Za Zlatnu značku općine Doboj Istok:

1. *Hodžić Aziz iz Klokotnice – za doprinos u odbrani zemlje,*
2. *Škrebo Hajrudin iz Brijesnice Male – za doprinos u društvenom razvoju mjesne zajednice,*

Za Pismenu zahvalnicu općine Doboj Istok:

1. *Karić Mustafa iz Brijesnice Male - za doprinos u odbrani zemlje,*
2. *Mešić Mufid - za doprinos u odbrani zemlje,*

Ja se nadam da će Općinsko vijeće jednoglasno prihvatiti prijedlog ove Odluke.“

Emira Karić, predsjednica kluba vijećnika SDP: „Predsjedniče, ja sam očekivala još jednu problematiku, a to je rad tročlane Komisije koja izvjesno vrijeme radi samo sa članovima iz reda općinskih vijećnika. Da li se to može u budućnosti izvesti na malo ozbiljniji nivo. Nije u redu da samo mi vijećnici o tome raspravljamo, jer u toj Komisiji postoje još dva iz reda građana. Zašto se oni ne pojavljuju? Malo nam je nešto obajšnjeno, ali mislim da je trebalo vršiti određene zamjene, pa ko voli neka izvoli.“

Selmin Karić, vijećnik SDA: „ S obzirom da je ovo bio posljednji sastanak Komisije u ovom sazivu nije bilo potrebe to problematizirati. Naravno u narednom periodu kada bude novi saziv Općinskog vijeća da se povede računa ne samo o ovoj nego i svim ostalim komisijama.“

Dr. Ferid Konjić, predsjedavajući Općinskog vijeća: „ Ima li još diskustanata? Ne vidim prijavljenih i dajem na izjašnjavaње. Ko je za ovu Odluku?

Glasanje: ZA – 15, PROTIV – 0, UZDRŽANIH – 0.

Ad.3. Razmatranje i usvajanje prijedloga Programa aktivnosti za obilježavanje Dana nezavisnosti BiH i Dana općine Doboj Istok.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Emira Karić, predsjednica kluba vijećnika SDP: „Pošto je šef službe na jednom Kolegiju bio zaista u pravu kada smo htjeli proširiti neku priču on je rekao vi ste ovo usvojili na Općinskom vijeću. Ja se slažem papir koji usvojimo mi to moramo, hajmo reći, poštovati ukoliko se demokratski ne složimo. Ja sam razmišljala, šefe, ovo skinuti sa dnevnog reda pošto se ovo ovako ne može usvojiti. Ako usvajamo nešto nedorečeno onda ne možemo ni da djelujemo po tome. Ja ću ići redom: Dan nezavisnosti – svečana sjednica Općinskog vijeća u 10 sati. Kada? Je li to za 1. mart? I gdje? Pošto sada odustajemo, jer za 25. novembar nismo imali svečanu sjednicu 25. novembra, tako da mi zapravo ovdje usvajamo da ne znamo ni mjesto ni datum. Takođe kada je u pitanju Dan općine znamo za ova sportska dešavanja, znamo za mjesto, ali ne znamo za vrijeme. Šta da sada usvojimo i kada dođe nije bilo ovo vrijeme, bilo je ono, a vi ćete reći vi ste usvojili, a ovo se ovako teško usvaja. Dan općine rekli ste svečana sjednica Općinskog vijeća sa početkom... Šta? Kada? Sala Općinskog vijeća. Stvarno nije dorečena ova informacija, odnosno prijedlog Programa aktivnosti. Da li bi trebalo sada uzeti neku pauzu, pa stvarno utvrditi. Dalje, izbjegli ste opet škole. Vidimo samo da je tu svečana akademija, a gospodin sekretar nam je u prijedlogu Programa naveo akademije, a ovdje se one ne navode, pa sada je li mi odmah

odustajemo od onog prijedloga Programa rada Općinskog vijeća. Predsjedavajući, voljela bih da mi vi objasnite. Vratit ću se takođe na ovu akademiju „Sve prolazi samo ti si vječna“ od Preporoda koja je bila i prošle godine. Ja neću ulaziti u program te akademije, ali bilo bi dobro da Preporod odustane od ovakve akademije ukoliko bude onako minoran broj građana. Znam da se oni trebaju potruditi, ali isto tako možemo Preporodu pomoći, odnosno neki mini sastanak, neko uvezivanje i ostalih kulturno umjetničkih društava i svega onoga što postoji od nevladinog sektora na općini Doboj Istok. Nije mi bilo ugodno kada sam bila prošle godine, bilo je na prste nabrojati i četiri ili pet puta je bilo više učesnika nego gledalaca. Znači trebali bi malo u eter šta će se događati, malo zainteresovati građane da ipak u kakvom takvom broju dođu. Šefe, ako možete nam malo više pojasniti i predsjedavajući takođe, pa onda da usvojimo.“

Hasan Hasančević, predsjednik kluba vijećnika SDA: „ Pošto prvi puta izlazim uvaženi predsjedavajući, zamjenice, kolegice i kolege, načelnice sa saradnicima, mediji želim iskreno da vas poselamim i pozdravim. Ovo je program koji mi standardno usvajamo. Znači mi smo se dogovorili da će načelnik imenovati komisiju i mislim da će to biti završeno. Znači da 19.02. imamo Kolegij za sljedeće sjednice koje će biti redovne i svečane. Do tog Kolegija, kao što je i do sada bilo, trebaju da se utvrde datumi i termini i mjesta održavanja svih manifestacija. Tako da ja ne vidim u ovom ovdje ništa sporno, jer smo i do sada tako usvajali. Svečana akademija postoji i čak se sa predsjednikom Preporoda razgovaralo da to bude masovnije i bogatije ove godine. Znači i do sada smo ovako usvajali i ne vidim razlog zašto ne bi opet usvojili, jer svaki puta smo po dva puta išli. Plan i program, pa je poslije išlo ili na komisiju ili na dogovor.“

Emira Karić, predsjednica kluba vijećnika SDP: „Prisjetit ću se Kolegija kada je kolegica Senada htjela da mi prisustvujemo priredbi povodom Dana državnosti. Znači, na Kolegiju smo se dogovarali, a vi ste rekli da je to gotova stvar pošto smo usvojili na Općinskom vijeću ovo što smo usvojili. Ja samo hoću da mi ovdje šef kaže da li je to fleksibilna stvar ili ćete opet na Kolegiju reći da ne možemo mijenjati, jer smo usvojili ovo što smo usvojili. Znači, ovdje priredbi nema. Dalje, nema vremena, na Kolegiju mi možemo dogovoriti. Kažeš do sada je bilo ovako, ne, bilo je mjesto i vrijeme tačno, koliko ja čitam materijale. Ja ne želim ovdje nikakve negativne reakcije. Kažem opet su se izbjegle škole. Jesu li to nova previranja? Mislim da politiku zaista trebamo odvojiti od škole i raditi na ovaj način da odvojimo politiku, odnosno da se sve škole, vrtići i sve što može pokazati, hajmo reći, kvalitetan program uvrste u kalendar dešavanja općine Doboj Istok. Znači na Kolegiju da li se možemo dogovoriti, ne znam, ali treba komisija. Da li komisiju potvrđuje Općinsko vijeće ili Kolegij, ni to mi nije jasno. Ja kažem to mora biti stalna komisija, ali ako je stalna komisija, onda je mora potvrditi Općinsko vijeće, a evo tu smo, a komisije nema. Mi možemo opet tu ad hok komisiju, a prijedlog je bio da se formira, ali znam ova godina je izborna i nemamo mi to još puno raditi u ovom sastavu, možemo opet donekle ozbiljnije raditi nego da kažemo da je sve pro forme.“

Kemal Bratić, općinski načelnik: „ Nije ovo ni nalik na prošli slučaj kada smo bili nagovarani da idemo u školu. Sada imamo sasvim dovoljno vremena da imenujemo komisiju i da vam kažem da ni ja nisam za to da se škole izbjegnju. Škole treba koristiti u svakim prilikama pogotovo kada su ovakve svečane manifestacije. Znači bit će imenovana komisija koja će tačno utvrditi satnicu i vrijeme održavanja, a možemo proširiti sa određenim aktivnostima ukoliko bude bilo potrebe do Kolegija i da tada imamo tačno vrijeme i satnice manifestacije, jer sada je malo rano da imamo sve u minutu i ova sportska takmičenja. Mislim da ne treba ponižavati, ne znam kako bi se izrazio da me pogrešno ne shvatite, ipak se tu određeni broj ljudi potruđi kako iz općinskih službi tako i iz ovih naših udruženja građana koji itekako doprinesu da se ovi svečani datumi obilježe i da u što većem broju građani budu prisutni da bi zajedno sa nama prisustvovali na tim manifestacijama. Ne treba to tako sve dočekivati, a pogotovo ne treba sada vezati, jer kakva politička previranja, nema političkih previranja na Tuzlanskom kantonu, koliko ja znam. Možda

u našoj općini ima nekakvih nelogičnih koalicija ili svašta nešto, ali na Kantonu nema. U našem Kantonu se zna kod koga je pečat, nije sakriven, hvala Bogu, kantonalna Vlada i Skupština rade u punom kapacitetu. Tako da smatram da niste u pravu i da imamo sasvim dovoljno vremena. Evo razmišljam, ako se slažete, da budete i vi u komisiji pošto imate dovoljno iskustva i ideja i da budete zajedno sa nekim od vijećnika. Ja ću u ponedjeljak imenovati komisiju tako da komisija ima vremena da proširi i da Vijeće donese zaključak da ukoliko komisija procijeni da stavi još neke aktivnosti, a tako se i do sada radilo.“

Emira Karić, predsjednica kluba vijećnika SDP: „Ja vam se zahvaljujem što ste me planirali imenovati i naravno da ću sve obaveze vijećnika ispuniti, jer to mi je dužnost. Nisam mislila ništa u negativnom smjeru ni vezano za dešavanja na Kantonu, mislila sam nešto vezano za Općinu. Isto tako bih tako predložila svima ne kunite se ni vi ni u kakve koalicije, jer danas su strašno turbulentna vremena. Na kraju krajeva mi smo i navikli na sva ta dešavanja koja se mogu iz minute u minutu da promijene, tako da se ni ja ne bih klela ni u pečate, ni u koalicije, jer danas je teško ostati normalan i teško je ostati korektan. Izašla sam sa jednim prijedlogom, ukoliko bude vijećnika koji će obnoviti svoje mandate uskoro, mislim da bi trebalo insistirati na nekom kalendaru nekih važnijih datuma u našoj općini. Znači zaista sjesti i razmisliti šta bi se to moglo u nekim mjesecima ako se ništa ne dešava i uzeti neke svjetske datume, kako kome naupadne, odnosno koliko budemo kreativni, pa da imamo u nekom budućem sazivu Općinskog vijeća neki kalendar, pa neka stoji tu. Da li će se ispuniti ili ne i da li će ići neka dešavanja, u svakom slučaju jako je dobro za svaku općinu da se uvijek nešto dešava, a stvar je samo koliko mi želimo učestvovati i dati svoj doprinos tim dešavanjima.“

Dr. Ferid Konjić, predsjedavajući Općinskog vijeća: „Ovo je okvirni plan i program. Mi se trebamo osloboditi nečega da nas neko poziva, trebamo se uključiti sa svojim prijedlozima. Imamo usvojene datume obilježavanja, nije ništa sporno, ima dovoljno vremena da svaka škola napravi program i da delegira prema komisiji, odnosno šefu službe svoje aktivnosti za nekakav datum. Drugo je što nas treba neko moliti hoćete li vi učestvovati. Mi se moramo mijenjati u tom pravcu. Sve je definisano, samo ako hoćemo mi to prihvatiti. Znači 1. mart je 1. marta i to se ne mijenja. Svaki puta se obilježava 1. mart, obilježava se 10. mart, obilježava se 25. novembar i samo je stvar hoćemo li mi prihvatiti i delegirati, imamo tu aktivnost i nudimo vam da to uradimo. Kao što je Fajko rekao na kraju svako ko bude radio radi nečega, neće to dobiti, ali ako bude radio zato da se uradi nešto, on će na kraju dobiti nagradu. Mi se svi možemo angažovati ako hoćemo. Ako se nećemo angažovati, onda ćemo čekati i na kraju ćemo problematizirati, a sve se može problematizirati i u svemu se može vidjeti politika. Možemo iz svega isključiti politiku i nigdje da se ne vidi politika i da radimo. 1. mart se obilježava, a mi smo uveli da imamo naš plan i program okvirno. Znamo da Kolegij određuje termin sjednice i ovdje stoji 10, a hoće li biti u 10 sati ili kasnije to Kolegij određuje. Znamo da će biti obilježen 1. mart kao Dan nezavisnosti i 10. mart Dan općine. Svaka škola može ponuditi, ne samostalno da rade, nego da se uključe u cjelokupnu zajednicu. Hajmo se malo promijeniti i reći mi delegiramo, a onda se već za iduću godinu možete pripremati, pa reći za 1. mart ćemo pripremiti u koordinaciji dvije škole osnovne i srednje škole da zajedno svi radimo. Niko vam neće reći nećemo mi dozvoliti da se nešto uradi.“

Emira Karić, predsjednica kluba vijećnika SDP: „Dobra je diskusija, ali nisam razumjela zašto ste to diskutovali, jer su meni vrlo jasne ove stvari vezane za datume koji se obilježavaju već u mom drugom mandatu. Nisam razumjela diskusiju, jer mi znamo kada je 1. mart, znamo kada je 25. novembar, znamo da je 10. mart Dan općine. Govorim molim vas prisjetite se za 25. novembar nije bila svečana akademija napisana u programu koji smo mi usvojili na Općinskom vijeću. Onda smo na Kolegiju raspravljali da li da uzmemo priredbu iz škole Klokočnica. Naravno ja sam se složila da ne uzmemo priredbu, jer ne učestvuje škola Brijesnica i ne učestvuje srednja škola i načelnik je tu bio u pravu. Kada je u pitanju obilježavanje kao akademije vi ste rekli

usvojili smo bez akademije i onda je to kontradiktorno ovome što vi kažete mi smo znali u našoj školi, vidjeli nema priredbe i mi smo se bez veze pripremili za taj 25. novembar. Ja samo govorim da se ne događaju te stvari. Mi tačno znamo u našoj školi šta pripremiti za općinsku priredbu, šta za školsku, šta za područnu školu itd. da vas sa tim ovdje ne davim. Upravo o tome i govorim trebaju se učvrstiti ti datumi 1. mart, 25. novembar, Dan općine, 4. juli ne možemo, jer je raspust i to mi znamo i ne treba odustajati, jer smo za 25. novembar odustali od priredbe. Kada sam govorila o kalendaru nisam mislila da se ovo uvrsti nego još neka dešavanja. Imate Dan borbe protiv fašizma, imate Dan bijelog štapa i možemo još nešto uvrstiti ukoliko smatrate da bi Općina i nevladin sektor na Općini mogao neke aktivnosti da pruži.“

Kemal Bratić, općinski načelnik: „ Ovo je očito nerazumijevaje, ali nije nikakvo čudo. Vi ste na jednoj od prethodnih sjednica rekli da je u Bosni bio građanski rat od '92 – '95. tako da nije uopšte čudna takva diskusija. Znači svako od nas prije svega, da li bila kakva manifestacija, kakva akademija bitno je ono što nosimo u srcu za našu Bosnu i Hercegovinu i za našu Općinu. Da li ćemo se mi negdje promovisati politički ili nepolitički to je po meni najmanje bitno. Ono što je najbitnije jeste šta mi osjećamo prema svojoj lokalnoj zajednici i prije svega prema Bosni i Hercegovini. Ja ne mogu da shvatim nekakve diskusije pogotovo o stvarima koje smo mi itekako unaprijedili u nekom prethodnom periodu. Ne umanjujući ničiji prethodni rad, ali idemo korak po korak i pravimo masovnije i organizovanije, naravno nismo mi to sami, nego ponavljam sva naša udruženja koja daju određeni doprinos da bi se te manifestacije uveličale. Da li je to dobro, da li to može bolje, evo imenovat ćemo komisiju da ona što predloži. Predsjedavajući, molim vas da ide zaključak ukoliko komisija dođe do ideje da još nešto treba ubaciti u ovaj plan Kolegij će naravno razmotriti i usvojiti. Ono što je najbitnije da svako od nas doprinese obilježavanju kako jednog tako i drugog značajnog datuma. Molim vas da ne gubimo vrijeme na ovim stvarima, jer sve je jasno, čisto kao suza. Komisija će sjesti, odrediti termine i datume, dodati još manifestacija ukoliko bude potrebno i hajmo raditi.“

Dr. Ferid Konjić, predsjedavajući Općinskog vijeća: „ Ima li još diskutanata? Ne vidim prijavljenih. Znači dodajemo uz ovaj prijedlog da se formira komisija koja će zajedno sa službom pripremiti za Kolegij sve potrebne stvari sa načinom dešavanja i tajmingom. Ko je za?“

Glasanje: ZA – 15, PROTIV – 0, UZDRŽANIH – 0

Ad.4. Razmatranje i usvajanje Izvještaja o realizaciji Programa rada Općinskog vijeća Doboj Istok za 2019. godinu.

Dr. Ferid Konjić, predsjedavajući Općinskog vijeća: „ Materijal ste dobili, dajem tačku na diskusiju.“

Fajik Muratović, vijećnik SDP: „Ovdje sam izašao kao predsjednik Komisije za boračka pitanja. Ovo Općinsko vijeće je formiralo tu Komisiju i za četiri godine nije uputilo ni jedan zahtjev prema toj komisiji, niti su boračke organizacije uputile i jedan zahtjev prema toj komisiji. Prema tome ja predlažem da se ova Komisija ukine, jer su svi borci ukovani u zakon. Ja sam uzeo na sebe i održao jednu sjednicu sa boračkim organizacijama. Oni su iznijeli svoje probleme, zapisnik ste svi dobili i niko nije po tome ništa poduzeo. Ja sam obišao sve boračke organizacije i zamolio ih da se obrate Komisiji ako nešto može učiniti, međutim niko se nije obratio i zato tamo u Izvještaju piše da nije imala ni jedan sastanak.“

Dr. Ferid Konjić, predsjedavajući Općinskog vijeća: „ Ima li još diskutanata? Ne vidim prijavljenih. Fajkin prijedlog može se uzeti kada bude idući saziv da se reduciraju i da se izmjene

komisije. Slažem se sa tim, jer to su promjenjive stvari i može se to mijenjati. Nažalost nije to jedina komisija, veći broj komisija nema nikakvih materijala da bi mogli raditi. Znači to ostaje za idući saziv da se eventualno mijenja. Nema više diskutanata i dajem na izjašnjanje. Ko je za ovaj Izvještaj?"

Glasanje: ZA – 15, PROTIV – 0, UZDRŽANIH – 0.

Ad.5. Razmatranje i usvajanje Izvještaja o kvaliteti zraka na području općine Doboj Istok.

Dr. Ferid Konjić, predsjedavajući Općinskog vijeća: „Materijal ste dobili, dajem tačku na diskusiju.“

Emira Karić, predsjednica kluba vijećnika SDP: „ Prije svega pohvala za ovaj period mjerenja 06.12. – 05.01. Znači to je to, jer svaki ostali period prikazivao bi neko drugačije stanje. Naravno mi možemo biti jako jako zadovoljni. Govorim o ovom periodu kada smo imali te naše auslendere kada su dolazili i preplavili našu općinu sa dodatnim automobilima koji je, vidim, jedini problem uz grijanje stanovništva. Mi nemamo nekih fabrika koje bi zagađivale, a da li je dobro, da li nije to je upitno. Da li sada raditi zaključak kao što je bio prijedlog Hasanov vezano za jezero iz Koksare, pa je išao zaključak prema Kantonu, čini mi se. Da li ga opet uraditi vezano za Termoelektranu, međutim to je federalni nivo. Naravno niko nije osnovni zakon ispoštovao kada je u pitanju Koksara i Termoelektrana, a kamoli izmjene zakona koje bi trebale hitno biti kada su u pitanju ova dva giganta. Hajmo se locirati na našu općinu, zaista trebamo biti zadovoljni. Ono što u budućnosti trebamo raditi, ko je pratio medije, stavljeni su potpisi na veoma značajna sredstva na federalnom nivou kada je u pitanju utopljavanje. Vjerovatno će ove godine ići realizacija i vjerovatno će ići prema kantonima, odnosno prema općinama. Ja se nadam, odnosno vjerujem da općina ima spremne projekte i da ćemo i na taj način poboljšati ovaj zrak na našoj općini, što je u svakom slučaju moguće. Meni je drago za ta stvarno velika finansijska sredstva na nivou Federacije. Vidjet ćemo koliko će doći na našu općinu i meni je drago što će građani i neke ustanove moći nešto uraditi po tom pitanju.“

Dr. Ferid Konjić, predsjedavajući Općinskog vijeća: „ Ima li još diskutanata? Ne vidim prijavljenih i dajem na izjašnjanje. Ko je za ovaj Izvještaj?"

Glasanje: ZA – 15, PROTIV – 0, UZDRŽANIH – 0.

Na ovaj način smo iscrpili dnevni red i ja se zahvaljujem na učešću u radu.“

Sjednica je završena u 10,45 sati.

ZAPISNIČAR
Behara Hadžić

SEKRETAR
Omer Hadžić

PREDSJEDAVALAČI
OPĆINSKOG VIJEĆA
dr. Ferid Konjić

Službena zabilješka:

Zapisnik je usvojen na 34. redovnoj sjednici Općinskog vijeća Doboj Istok održanoj dana 29.02.2020. godine.

U Klokotnici, dana 06.03.2020. godine

Zabilješku sačinio
Omer Hadžić, sekretar Općine